



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 8

France nung Bastille Day parade nung Modi tetushi tejaoker asütsü

Bindyarani Devi-i Asian Championships nung silver medal angu



VOL. XX NO. 204 (ADOK 204)

DIMAPUR AMUNGNÜ (SUNDAY)

MONUPII (MAY) 07, 2023

₹ 5.00

CM Rio-i Manipur CM den jembitep Nagaland sorkari Manipur-i bus 22 yokogo

Dimapur, May 6, 2023

(Agencies): Manipur Chief Minister N Biren Singh den jembidang tensa atema tebilemstütem lemsatepogo ta Chief Minister Neiphiu Rio-i ashi.

CM Biren dang Nagaland nung oa Manipur nung alirtem kümzüka ayutsü aser parnok anir aruba nung yariteptsü mepishiogo ta paisa ashi.

Imphal nung anendaka alirtem anir arutsü atema mapa inyadkar ta Home Department, Government of Nagaland-i metetdaksü.

Garitem yokogo aser Manipur sorkar aser central

security agencies nungi clearance aser security cover atar, ta Home Department-isa ashi.

Nagaland State sorkari Brihostibarnü Police Headquarter Nagaland aser Nagaland State Disaster management Authority (NSDMA nung Helpline numbers lapoktsüogo.

STATE POLICE CONTROL ROOM, KOHIMA

Landline: 0370 2242511

Fax: 0370 2242512

Mobile/ Whatsapp:

08794833041

Email: spcrkohima@gmail.com

NSDMA: 0370 - 2381122 /

2291123



Kohima, May 6, 2023 (TYO): Manipur nung Nagaland nungi Naga nung noklang aika anir arutsü atema state sorkari bus 22 yokogo.

"Onoki Manipur nung Nagaland nungi Naga nung anir arutsü atema mapa inyaker. Nagaland sorkari Naga kaketshirtem dang masü saka mapa inyaker tem anepalur" ta Nagaland Deputy Chief Minister Y. Patton-i ashi.

Manipur kübok Kangpokpi district nung yiruba nisung 8 tashi Kohima nung anir arua anepaludar aser tanü Y Patton-i parnok semdang.

"Nagaland state sorkari bus 22

den IRB platoon ana yokogo. Bus kar tanü Imphal tongogo aser taonung mesüra asüngnep tashi nung mezümpurtem Nagaland tonga arutsü" ta pai ashi.

Manipur nung Nagaland nung anir arudang yariteptsü atema state sorkari Assam Rifles dang nung security meshiogo ta Patton-isa ashi.

Nagaland nungi kaketshirtem aser tangar 600 tashi Imphal nung lir aser parnok anir arutsü, ta paisa shisem.

Yashi pai Manipur Chief Minister N. Biren Singh den phone ajanga jembioogo aser idangji CM Biren-i Naga nung kaketshirtem aser tangartem

kümzüksü nangzüka osang Patton-isa lemsatep.

Tanü Y Patton-i Manipur lendong nung yirur nisung 8 anepaluba mozü ki semdang. Paisa parnok nem senotsü teyari agütsü.

Yirurtem rongnung parnok 6 Brihostibarnü Kohima-i aru aser iba sülen tanünga nisungtem aru. Par pezü general ward nung lir, asem ICU nung aser ka injang agi yirur cabin nung anepaludar.

Manipur nung mepetmesü adokba atema temulung raksar aser sasa bilemer. Manipur sorkari iba ken o ya teti atema tembangtsü mepishir, ta Deputy Chief Minister Y Patton-isa ashi.

NESO-i Ministry of Civil Aviation dang mepishir

Kohima, May 6, 2023 (TYO): Ministry of Civil Aviation (MCA)-i Manipur nungi nisungtem anitetsü atema yariteptsü ayongzüker ta North East Students' Organisation (NESO)-i Honibarnü metetdaksü.

"Manipur nung tensa atema temulung mesüngjemteter, iba ajanga state balala nungi nisung aika taolen mali kümogo aser parnok tangsa anitetsü nüngdaker" ta NESO secretary general Mutsikhoyo Yhobu-i MCA dangi shidi ka zülü.

Manipur nung tensa majungba ajanga regular air services nung timtem ajurua lir. Anungji Ministry of Civil Aviation-i nisungtem aniteta pei pei state-i anir aotsü atema chartered flights agütsüsüla, ta NESO-isa metetdaksü.

Mi senoktsüba aser ozüing alema inyaksangshi balala ajanga nisung aika indang kulikakettem samaogo anungji ketdangsurtemi sensotem nem timtem magütsü parnok maitsü jangjatsü asoshi lenmang bushiteptsü mepishir, ta NESO-isa ashi.

SAYO-ia Manipur atema helpline lapoker

Kohima, May 6, 2023 (TYO): Manipur nung tensa mejungi akümba atema Southern Angami Youth Organization (SAYO)-ia Manipur nung Southern Angami nung aser Nagaland sensotem atema helpline ka lapokogo.

Nagaland sensotemi SAYO den

tsünglanglen agüja aliba number ajanga tongteprateptsü akok:

Metekhrielie Mejura, President +919436005056, Meteviso Sophie, General Secretary +919855303230 and Medovo Rikha, Convenor, Action committee +919366318244.

Assam Rifles-i 'Operation Kohima Calling' inyaker



Dimapur, May 6, 2023

(Agencies): Assam Rifles-i Manipur yimtiba Imphal nung anendaka aliba Naga kaketshirtem anir arutsü atema 'Operation Kohima Calling' tenzüko.

Brigadier Ved Beniwal lenisüba kübok Assam Rifles Column-i iba mapa inyaksü.

May 7, 2023 nü RIMS, Central Agricultural University (CAU) aser Koirengei nungi kaketshirtem anidentsü ta osang metetdaksüogo.

Kaketshir ajaki ka den ka amalitepa mapa shitak nung pick-up points atongtsü mepishir ta

Assam Rifles-i metetdaksü.

Brigadier Ved Beniwal lenisüba kübok column nung ketdangsurtem:

Major Hashir Ahmad - 7408200275 and 8162958214

Assistant Commandant Tamang - 9862659130 and 8250599861

Operation Kohima Calling dak sendakba osang tejangja metetnürtemi tsünglanglen agüja alirtem den tongteptsü akok.

Colonel Umesh Sati - COMMANDANT 1st AR- 8650232211

Lt Col Abhijit Pawar - 9839122908

Manipur state sorkari 'shoot at sight' tetuyuba sülen ka khaset

Imphal, May 6, 2023

(Agencies): Manipur nung tensa mejungi aliba mapang ka nung May 5 nü Army-i law & order azioktsü atema lanur ka khaset.

Bishnupur district dena Manipur nung district 8 nung alirtemi ST ken o atema ashishiteper ta osang angazüker.

May 5, 2023 aonung 11:00 ako meta lanur telok ka pei pei kidang nungi kimai alu saka idangji Army-i tensa azioka ayutsü atema injang khaloktsü. Idangji lanur ka asü aser

iba ya state sorkari 'shoot at sight' orders agütsüba sülen mezüngbuba tasüba lir.

Tasüsang ya Bishnupur district kübok Nambol nung Biyashning Thoujam (23) ta jangjaogo.

Külen, Manipur Chief Minister N Biren Singh-i tanü all-party meeting ka ayonga menogo.

Party tangatetba alema nisung ajaki tensa süngjemdaksütsü atema inyaksüla ta Biren Singh aser taoba Chief Minister Okram Ibobi Singh nati mulungtep.

Manipur kübok tesem balala nung security forces indang company 14 mapa lemszüka lir aser Centre-i ano company 20 yoktsü.

Tenemlen aliba Meitei nung aser Imphal valley nung alir Kuki nung dena nisung 20,000 shi ka mepetmesü adokdak nungi anienogo.

Tesüiba anogo ishika tsüngda police posts 8 nungi prangpong-injang rakzüka bener aoba ajak meyipjang ta police-i metetdaksüogo.

Manipur nung nisung 54 süogo; Imphal valley tensa tajungba akümer

Imphal, May 6, 2023

(Agencies): Manipur lendong nung tasür ajak agi nisung 54 liasü ta ketdangsurtemi ashir saka unofficial osang ajangabo iba dang nungi teimba asüba indang ashir.

Honibar nungi Imphal Valley nung tensa tajungba kümogo aser dokan o shishilembadak lapokba den lenmang nung garitem senzüogo.

Tesem aika nung Army, Rapid Action Force aser Central Police Forces mapa lemszüka anüker.

Tanep Imphal jila aser tangalen dokantem lapok aser nisungtemi aonsotsü aser tanga nüngdakattem alitepa liasü.

Tasür 54 nungi Churachandpur district hospital nung tasü mang 16 aser Jawaharlal Nehru Institute of Medical Sciences nung 15 yua lir ta ketdangsur kati ashi.

Regional Institute of Medical Sciences, Lamphel nunga tasü mang 23 yua lir, ta paisa ashi.

Hokolbar aonung Churachandpur district nung tatalokba balala ana nung tenemlen aliba telungpur pungu khaset aser India Reserve Battalion jawan ana yiru, ta police-i ashi.

Injang agi yirur aika RIMS aser Jawaharlal Nehru Institute of Medical Sciences nung anepaludar.

Manipur nung sodi monga alir CRPF nung inyaker ajaki pei kibong anir anasatiba security base-i arutsü tuyur ta CRPF-i metetdaksü.

Manipur nung CoBRA commando ka tepsetba sülen iba tetuyuba agütsüogo.

Central Reserve Police Force indang CoBRA commando ya leave nung liasü aser Hokolbar anü ngdang Churachandpur district kübok par yimtsü ng nung nisung kati khaset.

CRPF-isa Manipur aser Nagaland Sector Office-i akokba tashi personnel tem yaritsü

metetdaksüogo.

Hokolbarnü Indian Revenue Service (IRS) Association-ia Imphal nung mapa lemszüka aliba Income Tax department ketdangsur ka tepsetba aitsüba metetdaksüogo.

"Imphal nung tax assistant Letminthang Haokip tepsetba khukhua aitsür. Mapa teinyakdak public servant ka tepsetba metentsü makok" ta IRS Association-i ashi.

Iba ama mapang tamajung ka nung onoki par kibong asoshi bilemstü, ta IRS Association-isa metetdaksü.

Manipur nung Bodbar nungi mepetmesü adoka tensa mejungi aküm aser iba sülen Army aser Assam Rifles sepa 10,000 jungnüa mapa lemszüksüogo.

Imphal Valley nung alir Meitei nung aser hill districts nung alir Naga o Kuki lisopurtem tsü ngdang mangatettep adoka rarateper.

C&S Sema-i Mobile ICTC vehicles 6 tenzüksüogo



C&S Sema-i Mobile ICTC vehicles 6 tenzüksüba noksa nung angur.

Kohima, Monupii/May 6 (TYO): Commissioner & Secretary of Health & Family Welfare, Y. Kikheto Sema-i, linük nung HIV timtiba aliba state tem rongnung Nagaland tanabuba jenjang nung lir ta shia, healthcare worker ajak dang iba mesen ya 2030 küm tashi nungbo samatsüsü asoshi NGO tem den teka amteper inyaksü ayongzüka liasü.

Kiphire, Phek, Peren, Dimapur, Mokochung aser Zunheboto district tem atema Directorate of Health & Family Welfare nung Mobile Integrated Counseling and Testing Centre (MICTC) Vehicles trok tenzüksüba sentong nung o jembiba mapang Sema-i iba olen lemsatepa liasü.

"National average 0.22% den medemangra Nagaland nung Adult HIV positivity rate 1.31% lir, koba linük nung HIV timtiba aliba state tem rongnung tangbuba lir," ta pai ashi.

Iba dak sendakba nung Sema-i, department ketdangsurtem dang NGO tem den longjemer tashidak tendangba, anepaluba aser tashidak indang nüburtem nem tangazükba agütsüba jenjang ajungketshitsü aser iba den Sustainable Development Goal (SDG) dak sendakba nung 2030 küm tashi nung samatsüsü asoshi nukjidong yur aliba tanga tashidaktem atema longjemer

inyaksü ayongzü.

Pai ashiba agi, Nagaland-i tang tashi nung MICTC vehicles tasen 10 agizükogo, kechiyong Mon, Longleng, Tuensang, aser Noklak district tem nem iba gari February 16 nü agütsüogo. Wokha aser Kohima district nema mapang tatsüka tsüngda iba gari agütsüsü, ta paisa ashi.

Maneni pai, Nagaland nung health service dak sendakba nung tetsükdaksü aliba aser nungdak reprangteta tang amshia aliba MICTC gari tejen 10 tasen agi melentsüba aser iba den bendenloksema gari talila ana agütsüba atema kanga pelaba lemsatepa liasü.

HIV aser AIDS tashidak kanga bulua aliba state tem rongnung Nagaland ka lir aser nungdak reprangteta Centre sorkari gari tejen ajak melentsüsü asoshi jenjang agiogo, ta pai ashiba den, gari tasen bener aruba den service tajungba agütsüsü asoshi khuret dena sendaka lir, ta ashi.

Sentong nung Projector Director NSACS, Dr Akuo Sorhie-i okile jembiba mapang, Nagaland atema NACO ajanga Global Fund sponsored MICTC vehicles 12 bener aruogo, aser iba ajanga state kübok field tem nung tetsükdaksü aika ajangshibatem bentetsü, ta ashi.

Küm 14 dak tema sülen MICTC van tasen trok tashi tenzüksüba ya HFW

Department aser talisa NSACS atema nemadangtsü mapang ka lir aser gari tasen trok densema state nung mobile ICTC van tasen 10 jungogo, ta lai ashi.

"District ajak nung MICTC vehicle tem amshia tashidak tali tendangtsü aser treatment tajungba agütsüsü atema Nagaland state HIV/AIDS Program nem lenmang lapoktsüba atema tenla agütsüba lokti tentetem aser NACO dang kanga pelar," ta lai ashi.

Garitem ya HIV/AIDS Program ajanga bener aruaka MICTC van tem ya district balala nung tang agia aliba integrated program inyakyimtem atema amshir aser ibayongji district ajak nung Chief Medical Officer tem lenisüba nung Department-i Health camps balala ayongzüka agiba Reproductive & Child Health, Viral Hepatitis Program, Prison Intervention covering schools aser colleges, Health Melas amala sentongtem nung teyari agütsür, ta lai ashi.

Sentong balala ajak den sendaktepa inyaka MICTC vans amshia nungdaka aliba purtem nem teyari agütsüsü asoshi Nagaland State AIDS Control Society (NSACS) bendanga agütsür lir, ta Sorhie-i ashi.

Iba sentong ya Deputy Director, Dr Nukshisangla Jamir lenisüba nung agia liasü.

NBSE-i NSEE 2023 indang metetdaksü

Dimapur, Monupii/May 6 (TYO): Nagaland Board of School Education-i sangdong ka ajanga, Para Medical/Agri aser Allied degree course tem atema Nagaland State Entrance Examination (NSEE) 2023 May 17, 2023 nü agitsü ta metetdaksüogo.

1. Candidate temi NSEE 2023 atema pei Roll number aser tang guidelines aser tetuyubatem jangjatsü atema Board indang portal semdangtsü nungdaker.
2. Candidate temi May 13

Tatidang agitsüba centre tem yamai alitsü:

Kohima:

Sl. No.	Centre	Total Enrolment
1	Ministers' Hill Baptist Hr. Sec. School, Kohima	350
2	Bethel Hr. Sec. School, Kohima	300
3	Don Bosco Hr. Sec. School, Kohima	268
Total		918

Dimapur

Sl. No.	Centre	Total Enrolment
1.	Christian Hr. Sec. School, Dimapur	392
2.	Holy Cross Hr. Sec. School, Dimapur	391
Total		783

Wokha nung yi raksa intok



Dimapur, Monupii/May 6 (TYO): May 6 nü Wokha nung yi tapu balala raksa intoktsüogo. Honibarnü raksa intoktsüba yi tem ya Wokha district kübok tesem aser mapang balala nung pudenbatem lir.

Raksa intoktsüba yitem rongnung MC whisky bottle 96, Royal stag bottle 63, Blenders Pride bottle 68, Vodka bottle 164 aser case 5, AC Black bottle 184, MC Rum bottle 448, Rum (Calendar) bottle 48,

Kingfisher beer can 390 aser case 43, O/C Blue bottle 121 aser case 12, Rum Old Monk bottle 39, Imperial Blue bottle 97, Bacardi Black bottle 3, Rum (Luxury) bottle 48, Bacardi Breezer bottle 51, Budweiser beer case 9, Cane Beer can 164 densema liasü.

Yitem ya Addl. PP, SDPO Wokha, Prosecuting Inspector (PI), aser O/C Wokha matsügang raksa intoktsüba liasü.

PD aser BDO tem senden menogo



Kohima, Monupii/May 6 (TYO): Rural Development Minister Metsubo Jamir-i Honibarnü sangdong ka ajanga, department district office ajak indang leave aser attendance DC aser ADC tem azüoktsü, koba DPDB tem nung table asütsü, ta metetdaksü. Iba dak sendakba nung pai PD aser BDO ajak dang pei tata tesemtem metoktsüi mapa shidak inyaksangshitsü mepeshia metetdaksüogo.

RD Conference Hall nung May 6 nü Project Directors (PDs) aser BDO tem Conference nung o jembiba mapang Jamir-i senden nung attendance ajang ajanga benoktsüla ta ashiba den department-i ayongba

sendentem nung ketdangsurü ajaki shilem agitsüla, kechiyong iba amala senden ayongzüka amenba mapang ken o balala benoka sensak asemer aser tongtibang osangtem lemsateper, ta ashi.

Minister-isa, RD programme balala aser district nung takok balala angubatem aser tang tinyakdak aliba maparettem indang Districts presentation tem lepa reprangshiba den iba dak sendakba nung sensaksema liasü.

Commissioner & Secretary, RD, Neposo Theluo, IAS-ia, PD ajak dang district nung maparentem benoka inyaksangshiba asadanga alitsü atema ita shia lepareprangshiba senden ayonga amentsü

tetuyuba agüja liasü. Paisa, ketdangsurtem dang ministry-i lateta toktsüba guideline tem sülen tashi anga anidaksü aser pei mapa tali yakyaka benoka inyaksangshitsü ayongzü.

Sentong nung RGSA, MGNREGA, PMAY-G amala RD programme tem indang metetdaksü aser kasa mapang nung PD, DRDA Tuensang, PD, DRDA Kiphire, PD, DRDA Mokochung aser PD, DRDA Peren nungeri district nung takok angubatem aser tang mapa tinyakdak alibatem indang osang metetdaksü.

Sentong nung Director, RD, Azenuo Peinyü-i lokti pela agizükba o jembiba aser Addl. Director, RD, Shekiho Phuleshe-i tepela anküp o jembiba liasü.

Sericulture Dept. co-ordination senden menogo

Dimapur, Monupii/May 6 (TYO): Mezüngbuba Sericulture Department co-ordination senden May 6 nü Directorate Conference Hall, Kohima nung menogo. Iba senden nung Advisor, Minority Affairs & Sericulture, Imkongmar-i shilem agia liasü.

Sentong nung Director of Sericulture, T. Sanny Pongener-i lokti pela agizükba o jembiba aser iba sülen metetpela mapang agi aser District temi 2022-23 küm tsüngda department inyakyim

dak sendakba nung PowerPoint presentation agüja liasü.

Co-ordination senden nung o jembiba mapang Advisor, Imkongmar-i, senden ayongzüka atema aser District Controlling Officers tem den ajuruteptsü atema maongka agütsüba atema Director aser staff tem dang kanga pelaba lemsatep. Paisa, department inyakyimtem jangja alitsü atema mapang shia iba amala senden ayongzüksü atema ajungshia liasü.

Committee on Government Assurances senden ayonger

Dimapur, Monupii/May 6 (TYO): Committee on Government Assurances mendenbuba Kuzholuzo Nienu-i sangdong ka ajanga, School Education, Nagaland Public Works, Home, Civil Administrative Works, Justice & Law, Fire & Emergency Services, Higher & Technical Education, Health & Family Welfare, Fisheries & Aquatic

Resources & Public Health Engineering nungi Departmental Representatives senden ka May 19 nü 11:00 ako nungi tenzüka Assembly Committee Room nung ayongzüka metetdaksüogo.

Committee on Government Assurances züngsem ajak iba senden nung tamakok maludaksüi arua shilem agitsü metetdaksüogo



May 06, 2023 nü Bengaluru nung Karataka Assembly election atema Ato kilonser, Narendra Modi-i roadshow nung shilem agidang tangokba noksa nung angur.

BJP lenirtemi Kharge tepsettsü asalentong yanglur: Congress

New Delhi, May 06

(Agencies): Honibarnü Congress party-i, BJP lenirtemi Congress party Tir, Mallikarjun Kharge aser par kibong züngsemtem tepsettsü atema asalentong yanglur, ta metetdaksü.

Osangbenertem senden ka nung jembidang Congress lenir, Randeep Singh Surjewala-i, Chittapur nungi BJP candidate ka indang audio recording ka ajanga iba asalentong alibaji jangjar; BJP candidate sangji Ato kilonser Narendra Modi aser Karnataka Chief Minister BS Bommai nati sapuba lenir ka lir, ta metetdaksü.

"Mallikarjun Kharge aser par kibong rangben BJP-i tepsettsü atema asalentong yangluba ya yimtenren tsütsü teküboktiba jenjang nung inyakba lir. Karnataka nungertemi lenla ajungalen nungi Congress party moatsüba aser taruba Karnataka assembly elections nung tamakok kanga mejungi angutsü aliba agi BJP aser lenirtemi AICC Tir Mallikarjun Kharge, pa kinüngtsü aser kibong rangben tepsettsü atema asalentong yanglur," ta

Surjewala-i ashi.

Surjewala-i, Kharge jenjang junga akümbaji BJP-i magizükteter, ta ashi.

"Central aser state BJP lenirtemi Karnataka chir Mallikarjun Kharge kanga sempar. Factory ka nung aayanger Dalit kibong ka nungi sotetba, Kharge block Congress Tir akümba nungi tenzüka Indian National Congress Tir tashi akümbaji BJP-i magizükteter," ta Surjewala-i metetdaksü.

Surjewala-i ashiba agi, taküm February 27 nü Ato kilonser Modi-i Kharge luja liasü.

"Tan ita May 2 nü BJP MLA aser BJP General Secretary, Madan Dilawar-i Mallikarjun Kharge südaksünüa, Congress Tir ya arrshi küm 80 tain, anungji tsüngremi mapang mashie ka nung pa anir aotsüa akok ta jembio. Tang BJP lenirtemi Mallikarjun Kharge, pa kinüngtsü aser par kibong rangben tepsettsü atema odi-odia asalentong yanglur," ta paisa metetdaksü.

Anogo ka jaksdang Congress-i audio clip ka lemsatep aser iba nungji BJP lenir jagi Kharge'er kibong samatsüsüla ta jembia lir, ta tai Congress-i tai tongloktüsü.

France nunger Bastille Day parade nung Modi tetushi tejaoker asütsü

New Delhi, May 06

(Agencies): July 14, 2023 nü France nung Bastille Day anogomong nung Bastille Day parade nung tetushi tejaokerji Ato kilonser, Narendra Modi asütsü.

Hokolbarnü France Tiri sangdong ka ajanga, "Parade nung France nunger sepaitem den külemi Indian armed forces nungia contingent kati shilem agitsü," ta metetdaksü.

France aser India na tsüngda asalentong tsütsü partnership yangluba sülen taküm küm 25 ajungbamong nung Modi-i France semdangtsü.

India ministry of external affairs-i sangdong ka ajanga, "India aser France na yimjung

aser security tsütsü kasa mangdang lir, talisa Europe aser Indo-Pacific atema mangdang kasa lir, aser ibaji ajanga Charter of United Nations nükjidongtem nungiter. Indo-Pacific region nung linük ana tsüngda amalitep nung iba ya amenoka lir," ta metetdaksü.

France Tir, Emmanuel Macron-i France National Day parade nung Modi tetushi tejaoker asütsü atema linük yimtiba, Paris-i jaokba nung ajemdaker Modi-i France semdangtsü.

MEA-isa, "Pai semdangba ajanga tang tensa nung tayongzükba balala atema longjemer inyaksü atema maangka angutsü, talisa climate change, arem-shiruru samaba

aser nükjidong balala ajangzüksü atema jembitsü," ta metetdaksü.

India aser France na tsüngda shishilembaba aser mitkartem tsütsü tesendaktep kanga junga lir. India-i France dang nungi Rafale fighter jets 36 alizükogo. France nunger rong yangluba Naval Group-i yaria India nung submarines (tzü telung nung senzüba rong) trok yangluogo.

2016 küm India nunger Republic Day sentong nung taoba mapang France Tir, François Hollande tongti tejaoker liasü. 2009 küm France Tir, Nicolas Sarkozy-ia Bastille Day parade nung tetushi tejaoker asütsü atema taoba mapang Ato kilonser, Manmohan Singh jaoka liasü.

Jammu nung sepa 5 poksetba sülen Rajnath-i Jammu semdang

New Delhi/Jammu, May 06

(Agencies): Jammu & Kashmir nung Rajouri district kübok Kandi arem nung tang sepaitem aser kiralongrartem teraradak mapang nung Honibarnü Defence Minister Rajnath Singh-i Jammu semdangtsü atema New Delhi nungi apusoa ogo.

Defence minister-i tang J&K nung kiralongrartem mita aoba tensa aser security tensa asadangtsü, ta ketdangsertemi metetdaksü.

Indian Army den Jammu & Kashmir Police aser CRPF sepaitem senteper kiralongrartem anema 'Operation Trinetra' aoba

mapang Hokolbarnep kiralongrartemi IED bomb ka pokdaksüba lendong nung sepa 5 poksetba liasü.

Asürtemji Lance Naik Ruchin Singh Rawat, Paratrooper Siddhant Chettri, Naik Arvind Kumar, Hav Neelam Singh aser Paratrooper Pramod Negi nunger liasü.

Honibarnep Jammu & Kashmir Lieutenant Governor, Manoj Sinha-i Hokolbarnü taküm bendanga agüja asür sepaitem nem akhüm agütsüogo.

Hopta ana tejaklen Jammu region nung Bhata Dhurian kübok Tota Gali area nung kiralongrartemi lenmang nung mendanger army truck ka

amakdang sepa 5 ponu asüba sülen Indian Army temi kiralongrartem mita ao tenzü.

General Officer Commanding-in-Chief (GOC-in-C) Army Northern Command, Lt. General Upendra Dwivedi-i J&K kübok Rajouri district nung kiralongrartem mita aoba tensa asadangogo. Honibarnü sepaitemia kiralongrar ka kasetogo. Honibarnüa sepaitem aser kiralongrartem maneni khatepogo.

Honibarnü J&K kübok Baramulla nunga sepaitemi Lashkar-e-Taiba (LeT) kiralongrar ka kasetogo, ta police-i metetdaksü.



May 06, 2023 nü Jammu nung J&K Lt. Governor, Manoj Sinha-i taküm bendanga agüja asür sepaitem nem akhüm agütsüdang tangokba noksa nung angur.

Opposition longjemtsü atema ni inyaksü: Sharad Pawar

Baramati, May 06

(Agencies): 2024 küm Lok Sabha elections atema opposition party tem longjemtsü asoshi common minimum programme ka renemtsü, ta Honibarnü Nationalist Congress Party (NCP) Tir, Sharad Pawar-i metetdaksü.

Pawar-i NCP Tir menden nungi anentsü sangdongba sülen anogo ishika lir Hokolbarnü pai iba telemtetbaji agiener aser maneni party Tir inyaksü, ta metetdakja liasü.

Honibarnü Pune kübok par jila, Baramati nung osangbenertem den jembidang pai, "Opposition party tem longjema alitsü atema ni inyaksü," ta metetdaksü.

"Taruba ita 10-11 tsüngda tesem aika nung elections agitsü. Nitish Kumar, Arvind Kejriwal, Chandrashekar Rao aser Mamata Banerjee nunger ama lenirtemia opposition longjemdaksütsü atema merangdar," ta Pawar-i metetdaksü.

"Opposition party tem longjemtsü atema ni-a shilem

agitsü, aser iba atemaji common minimum programme ka renemtsü," ta pai metetdaksü.

Osangbenertem den jembidang pa den par aianu chir aser NCP lenir, Ajit Pawar-a liasü.

Anogo asem tejaklen Pawar-i pai party Tir nungi anentsü osang metetdakja liasü saka Hokolbarnü osangbenertem den jembidangbo pai, party nung külem tenzükertemi mepishiba pai akhümtsübur, ibayongji pai maneni Tir inyaksü telemtetba agiogo, ta metetdakja liasü.

Pai Tir menden nungi anentsü sangdongba sülen NCP Party Tir tasen ka shimtsü atema committee ka tenteta liasü, saka committee jagi Sharad Pawar-i Tir menden nungi anentsü telemtetba agibaji magizüki liasü.

Honibarnep Pawar-i Baramati jila semdangba mapang nung yangji aliba NCP office ketdangpurtem aser party nung inyakertemi yimyim ayima pa agizüka liasü.



May 06, 2023 nü London nung India tatong Tir, Jagdeep Dhankhar aser High Commissioner of India to United Kingdom, Vikram Doraiswami nati UK nung Indian origin nungi MP tem den shisa lemsatetpba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, MONUPII(MAY) 07, 2023

Tsüngrem yimli

Kotakji Tsüngrem yimli, anungji yangji Tsüngremi mulungba dang inyaker. Aji oda, Tsüngremi kechi ashir aser kechi inyaksü tenyadir kotak tenyartemi kecha nungnanga melii inyaker. Ibaji mesüka tanü asenok aliba lima nunga asenok kibong aser mapa inyadkak ajak nung Tsüngrem mulung südakjang ta Yisui ashir. Tsüngremji anung aser ali madak kibur, Pai asenok yanglu ta asenoki amanger, saka asenoki Pai mulungba nung meliner. Aji oda, kiburi ashi mangaba kilirtemji asenok lir. Ibayongji, asenok mulungjang nung tepela malir kechiyong asenok taküm aser kibongji Tsüngrem yimli nung masü moiying yimli nung alir. Iba amaji jashia malitsü asoshi Yisui asenok dang Mathi tapu 6 nung, "Nü yimli arung, Kotak nung kechi koma lir, yamaji alima nunga nü mulung sang," ta Tsüngrem dang mepishia sarasademdaktsüner. Alemli Yisu Khrista alimai marudang Yihuda nungertemi Tsüngrem yimlji alima nung bendanger yimten yimsüsüba ajak makdoker, Yehovah Tsüngremi parnok nem yimten tashi agütsür, alima ajak ramoka Israel nungertemi yimsü asütsü ta bilema liasü. Ibayongji, kenü anogo Yisu nütsüngtemia Pa dang Israel nem kodang yimli meyipa agütsütsü ta asüngdangba Laishiba nung angur. Ajisüaka, Tsüngrem yimlji alima yimli amato masü, alima yimlibo rara asee meputep adokdaksür saka Tsüngremi yimli nungbo teti tepela aser tesünep lir. Ibayongji, anogo shia asenoki Tsüngrem dang kü mulungjangi, ozü kibongi, ozü telok dangi, ozü yimtaki mesüra onok alidaki "nü yimli arung," ta sarasademtsü Yisui sayu. Tetezü, kü taküm mesüra onok rongnung kotak nung ama nai mulungba dang inyadkakjang ta Tsüngrem dang mepishitsüba tongtibanga ta asenok nem angatetdaksür. Tanüa asenok aikati Tsüngrem yimlji asenoki manguba tasür tanülatem alidak kotak limaji danga ta bilemer. Ajisüaka, Tsüngrem yimlji asenoki manguba kotak limaji dangbo masü saka tanü asenok alidak lima aser asenok kibongtem ya lir. Anungji, idaki Tsüngremi mulungba inyaka alitsü tim. Aji oda, kodang asenoki asen taküm, kibong aser lokti ya Tsüngrem yimlia ta angatetter, idangji asenoki Tsüngremi mulungbaji kechi ta angateta inyaksü merangtsü. Yimten nunga kodang yimsüsürtemi parnoka Tsüngrem yimli nung tenzüker ta angateta yimsü südir, pei mulungba agi masü saka Tsüngrem mulungba nung yimsü asütsü. Iba kasaji arogo nung tenzükertemia kodang arogoji Tsüngrem yimlia ta angateta tenzükdir, tali tejangraba aser tajungba tenzüktettsü. Iba kasaji nisung shiai pei inyakba mapaji Tsüngrem yimli nung inyaker ta kodang angateta tenzükdir, ochimashi inyaksüba shisatsüji anasaia marutsü. Aji oda, kodang asenoki Tsüngremi mulungba inyaknua Pa dang asüngdangdir, Pai asenok dang lenmang sayutsü. Idangjibo asenok Tsüngrem den külemi Pa yimli nung Pai mulungba mapa inyaker tongti kaka akümstsü. Koba mapa südir süang, alima nung Tsüngremi mulungba mapa inyaka alitsübaajisa jangratemtsü taketba asütsü. Aji oda, Tsüngremi mulungba inyaksübaajisi yimten nung asütsüa akok, lokti nung asütsüa akok, arogo nung asütsüa akok mesüra pei taküm aser kibong business nung asütsüa akok. Atangji, asen taküm nung Tsüngremi mulungba mapa angatettsü aser reprangtettsübaajisi tasak, ibayongji Yisui asenok dang sarasadema Tsüngrem dang asüngdangtsü ajungshir. Sarasadema ajanga Tsüngremi asenok nem Pai mulungba mapa inyaksü asoshi renemtsütsü. Aji oda, asen taküm nung Tsüngremi mulungba dang inyadkakjang ta anogo shia asenoki sarasademtsübaajisi kanga tongtibang lir. Asen aliba lima ya Tsüngrem yimli kuma alitsübaajisi asen taküm aser kibong nungi tenzüksüla. Idangji dang, ano asen aliba lima nung Tsüngrem yimli ulushia kümyonga aotsüba mapa nung Tsüngremi asenok amshitsü. Asenoki aiben Tsüngremi mulungba ama masü saka aseni mulungba nung inyaksü asoshi yimten aser lokti nung shilem agir, kechiyong alima nung arogo dak alaka yimten aser lokti tentetjibo Tsüngrem yimli masü amai bilemer. Ajisüaka, asenoki yimten aser lokti nungbo 'nü yimli taru, onoki mulungba dang inyakdi,' ta ashitsü makok. Iba amaji bilema inyakerkem aika laogo aser ano laotsü, anungji asenokibo asen yimten aser lokti nung dena Tsüngrem yimli jaokdi.

OLEMSABANG

'APU KÜLENJI', AO KEN O SENTI BEREM KA (A Pearl In Ao Literature)

~ Limawati Longchar, Kohima

Laishiba aser lai den sendaktepba (religious) aser school nung azüngba primer toktsür, Naga nung oshi nung mezüngbuba kaketnuji (novelette), Wb. I. SashimerenAeri 1948 küm Ao nung züluba 'Jina - Etiben' ya lir. Ano Naga nungeri English nung züluba mezüng kaketji Aor samanir Wb. Tajen Aoi adokba 'Ao Naga Customary Law' (1957) lir ta angazüker. Atangji keno nunga Aorji samanir liasü ta item mapatem ajanga asenoki jangjar. Saka tesusatsü ka asenok Aor zülumen nung opang mapu adoker atsütepang tangar kin, tongtipangsa Angami nungeri asenok keno nung ajateter ogo.

Tawa tanü Ao o nung kaket aika adokba angudang kanga pelar aser asen kin keno züluba nung asüngsashia ainer ta bilemer. Saka repranga ao nung kaket tiemba ka taküm otsü (biographies) aser kin kidong süiren ta angur. Ajia junger kechiaser nisungtemi itemjia sapua azünger aser iba jagi keno renlokba nung yarir. Saka keno nung itemji jenjang temabai maier. Keno mapa tajungtibatemji (best literary works)sangro aser otsü kobai nübur ka jakla, libaliru, tangatetba aser teyongyaba etc tanütangtsü ama sayur itemji lir. Tepelatsüji keno zülur mongin Senka Ao aser P. Renthly Jamir nungeri-i anir lanur sempet aketer aika adokdaki.

Tanü tashi nung Ao nung züluba kaket ni azüngba rongnung tajungtibaji ozü tesayur Wb. Senka Ao-i züluba yimdangjem otsü (fiction) 'Apu Külenji' ya lir. Pai züluba kaket aika rong nung ibai tesübuba (latest but hopefully not the last) lir, koba taoba march ita nungang sala (released). Ni iba tapak 270 aketba kaket ya tepdaka ayutsü mokoki anogo ana-asek ka nung züngma (tenük tashi ait nungbo tekaraba nung züngmala). Oda otsüji koma atemtsü ta metetnuba teyongyaba nung iba kaket mapang ao memeteti züngogo. Yamaji atura mapang English novelbo aika züngogo saka Ao nung züluba novelbo ibai mezüng yamaji azüng.

Iba 'Apu Külenji' kaket ya kanga temulung jangrademtsü (interesting) otsü ka dang masü saka kanga tangazüksü aser temulung atangtsü aketba keno mapa ka lir. Iba otsü ya Mokochung Watsülar bazaar nungi tenzüker yimdangjem Ao yim ana-asek ka (imaginary/fictional villages) nung atalokba otsü ka lir. Tezüluri ashiba agi iba otsü nung nisungtemji (characters) yimdangjem tang lir, saka otsüji zünga aodangnisungtemji asenoki meteta aliba kar den kanga mesüktepa tazüngertemi angutsü. Ano tatalokba aser nisungtem jakla aser libalirujia asen Aortem yimya tanüdangtsü noksa amai asenoki angutsü. Talisa nüburtemi koda olulu proker, tangashiba/tebilembatemji angu ama jembir aser tangar taküm (others' business) nung koda Aortem juoker itemji iba otsü nung kanga dang shitakba nung amai angutsü. Olulu ajanga kibong nung timtem/mangatettep adokba, maksü ajuruba aser lendongi aibatem asenoki iba otsü nung angur.

Ano külen Aor sobaliba aser libaliru tajung, jaya jako tajung aser ochi agi ajak koktetba, iba otsüi tazüngertem mulungjang nung inoktsür. Arogo inyakyim kar aser asen Aor kibalenbuyim, kin kidong tesendaktep aser ken O jembiyim iba otsü nung shia lir. Ano kanga tongtipang kaji Ao oshi nung kanga tarok aser asenoki amaa oya aliba ojang aser olong aika amshia angutsü kobai asen Aor keno nung takar ta khuli sayur. Atangji iba kaket ya Aor keno nung senti berem ka lir.

Tanü Aor lokti ajak nung asen oshi wazüka ayutsü aser lanur nem angazükdaktsütsü indang jembir. Keno renloka aotsü aser asen nüburi sapua pei oshi angazüka aotsü aser jembitsüatema iba yimdangjem otsü kaket ya tongtoret ka amai asütsüla ta nibo bilemer. Kechiaser oshi junga jembitsü asoshi tazüngtsü kaket tajung alitsüla; tetezü otsü mesüra sangro azüngtsüji nisungtemi kangshia masü saka jangraa azüngtsüla. Aser tain tanur ajaki jangraa züngnüsüba kaket kaji iba 'Apu Külenji' yaa ka asütsü. Yamaji iba yimdangjem züluri keno tajung züluyimaika peritsür (fulfills many literary theories that make good literature). Iba kaket yagi Ao keno temaba bushiba, MA aser PhD tashi nung tazüngla ka süngtsür (fill the gap for higher studies in Ao literature). Anungji iba kaket ya ak matsüngdang prokba berem amai medoktsüi asenok Aortem jangraa züngra asen Aor keno nung ano maneni aintsü ta amanger.

Government of India-i Wb, Senka Aoi keno nung terenlok mapa jenti inyakba reprangteta (recognition) tenüngsang aser senpet tulu, Padma Shri agütsüogo. Aor lokti aser kijaia koda? Tematiba tenüngsangji, pai züluba kakettemji asenoki alir itemji sapuazüngra aser asen chirnur danga itemji azüngtsü ajungshira, aji asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeri angateta agitsü mepishir

Young Women's Christian Association Mkg tenzüker küm 25 jungogo



Young Women's Christian Association, Mokochung tenteter küm 25 ajungba sentong YWCA building nung takok ngua agir onük jembir L.H Thangi Mannen den YWCA (M) ketdangpur aser züngsemtem külemi tangokba noksa nung angur. Mokochung, May 5, 2023.

Mokochung, May 05, 2023 (TYO): Young Women's Christian Association (YWCA), Mokochung tenteter küm 25 ajungba silver jubilee sentong "We Mpower - leaving no one behind" omen dak rangloker May 5, 2023 nü Mokochung Park anasa aliba YWCA Building, Longpange Sector, Mokochung nung meraketa mungogo.

Tanü iba sentong nung YWCA (M) Patron, L.H. Thangi Mannen-i omen dak ajemdaker jembidang, iba omen ya I Tesalonika 5:11, "anungji nenoki inyakba ama, kati ka ajungshitepang aser tashi itdakang", iba Lai tokong tamendakdak lir, ta ashi. Iba omen yagi tetsür o tebur na tsüngta tesendaktep, lanurtem aser nüburttem külemi ka kuma lungjemer pei taküm nung aser lokti temelenshi adokdaksütsü asoshi lir, ta lai shisem.

Iba omen yagi meimchir tsüngta tebandang aliba ajangdanga oa taoba mapang sentoka aliba nüburttem lokti nung anioker. Ojang 'W' aser 'M' yagi tebur den külemi atongsema inyaka kibong nung aser asen lima aliba riju balala nung temelenshi adokdaksütsü asoshi lir, ta lai ashi.

"Leave no one behind" ya 2030 nung alima ajunga nung onük 17 ataloktsü asoshi United Nations-i 2015 küm renemba "17

Sustainable Development Goals (SDGs)" sentong kübok yangluba tenanzükbatem lir. Iba ya alima ajungaia sensak tia meshimeshia anendaksütsü, alima kümzüksü aser 2030 tashi nungbo nüburttem ajak yimjiyujung nung alitsü asoshi renemba nükjidong ka lir. Asenoki iba nükjidongji metongtetaka, iba nungji shilem tila kabo agitetsü merangtsüla, ta laisa ayongzük.

Nüburttem tarutsü alima ajungtsü asoshi bilema tzu junga amshiba, merükmejuba, alima tzu mopung kümzükka ayuba, tetsür jenjang ajungkettsü aser ano teinyaktsü aika lir. Joko sorkar dak imlaba aser tangar dak nentaka aliba mulungsenttsü ya melenshitsuila, nüburttem ayongdena asenok dak kechi tashi lir, iba yimya nungji inyaksangshitsü kanga tongtibang, ta lai ashi.

Lanurtemji terenlok maparen balala asoshi kanga tongtibang lir, anungji, nükjidong balala atalok asoshi lanurtemji teshisadanger ka sütet, temelenshi adokdaksür ka sütet, parnokji mapa tasen yangerteta aor ka sütet, otongdar ka sütet, kechiyong lanurtemji tarutsü alima lenirtem lir aser tarutsü alimaji parnok meyong lir, ta laisa shisem.

YWCA-i küm 25 tashi arudang talisa tetsür tanurtem asoshi mapa jenti inyakba den lokti asoshi mapa tajung aika

inyakba rongnung YWCA (M)-i Mokochung nung mezüng kindergarten tenzükbka, vocational training unit lapokba, alima tzu mopung kümzüksü asoshi maparen balala inyakba, Covid-19 mapang department balala den yaritepa shilem tulu agiba, aser ano aika lir, item ajak asoshi YWCA (M) nem tenüngsang agütsür, ta laisa pelaba metetdaksü.

Govt. kübok aliba department balala den telok balala aser mulungtet telok balalai YWCA (M) den külemi yaritepa lokti aser nüburttem asoshi maparen balala inyaksü laisa tayongzükba ka agütsü. Tongti o jembir, Thangi Mannen-isa YWCA (M) küm 25 ajungba nüngtem adokba jubilee nungo kaket ka dena sayatsü.

Tanü iba sentong nung YWCA mezüngpur rongnung 1st Vice President, T. Arenla Pongen, lanur ola ta sür YWCA (M) Youth Secretary, Imsubenla aser Jubilee Planning Committee Convenor, Lemshilaparnoki shilem balala agi. CradlePoint Preschool tanurtem aser YWCA (M), PASI, Yapangtula-i jubilee mungger ayongzükka ken tajung ka aten. MTBA Assoc. Pastor, Yanglu Pongen den sarasademer iba sentong tenzüker aser Mokochung Compound Pastor, Lanuwati-i YWCA (M) pur asoshi temoatsü meshia sarasademtsü.

ANO GO ABEN TSÜNGREM DEN

KIBUBAI AKOSHIR

"Ajiang ni kishizüng nung noktaker kishi nung akoshir; kari kü ola angashir kishi lapokra, ni pa dangi aittsü, aser pa den chiyunga ajemtsii, aser pai kü den chiyunga ajemtsü".

~J. Adok 3:20.

Noksa ka nung kishi shibanger tesülenji Yisu Khrista noktaker kishi nung akoshia yangluba noksaji angudang, kü den iba noksa jagi kanga jembir. Ki telung nung alisang jagi melapoktsü tashi pa yamaji tang noktaka alitsü, ta ni yongyasetta bilem.

Kü mulungjang kishi ni Yisu nem lapoktsütsü mulungtet.

Ni küm 19, asüandang; ni yangi lir ni yokang ta shibaisa ashitsü ta sayutsüngir jagi asüngdangdang "ni yangi lir ni yokang ta ni langzü. Na kü mulungjangi aitung aser ni yokang" ta ni Yisu kü mulung nung shia agizük. Ni kecha nunga takoksa mali. Ni tali tepelaba dang aküm.

Nisungi, Yisu agizükra, pei kidang akaba oset aika intoktsü ta tsübua bilem. Saka ibaji masü, Yisu nem kodang nai ne taküm agütsüdir ibaji ne taküm nung Yisu asoshi kishi lapoktsüba, aser kotak yimli temoatsü senmang agizükba kikümbang lapokbaji lir. Tsüngremi pei Chir dang tatem maka jenjang indang temoatsü kecha mezütoker mesüra sota mayur. Kodang nai pai mulungbatem inyaksü asoshi ne mulungjang kishi lapoktsüdir nai adangji süngmangtsü.

SARASADEM:

O Kibuba, kü mulungjangi na aitsü mulunga aliba asoshi pelar; aser yamaji shirisa na jaoker parnok ajak mulungjang nung na aita alir; iba asoshi ne tenüng asanger.

Manipur nung Khristantem anema inyakba telok aikati aitsür

Monupii/May 06, 2023: Khasi Jaintia Church Leaders' Forum (KJCLF)-i sangdong ka ajanga Manipur nung Tenla kitem raksatsüba aser tribal den Khristantem anema inyakba atema tatalokbatem aitsüogo.

"Iba rara ajanga takoksa angurtem aser pei ki toktsür jenshia sepaitem camp nung jenoka alirtem atema Forum-i sarasademtsüba den külemi tasü itta alitsü aser longjema alitsü ayongzük," ta KJCLF secretary, Rev. Edwin H Kharkongor-i sangdong ka ajanga metetdaksü.

Kharkongor-isa, "Tenla ki 24 raksatsüba mesüra rongdoktsüba sülen anogo ka lira maneni Tenla kitem raksatsüba osang angashir aser region nung Khristantem anema inyakba osangtem angashir," ta metetdaksü.

Forum-isa Centre aser Manipur sorkar naprongla dang tekara nung tensa azioktsü aser mangatettep ken otem bentetsü mepishir, ta metetdaksü.

Ano külen KJCLF-i region nung aliba Arogotem aser Khristan lenirtem dang tribal nisungtem aser Khristantem

atema longjemer sarasademtsütsü ayongzük.

Baptist Churches Union of India (BCUI)-ia Manipur nung alir ajak dang yimjung nung alitsü ayongzük, "Teraksatsüba aser tepsetba ajanga onük kecha mebentetsü, saka adianutem tsüngda zübo ang akettsü," ta metetdaksü.

Zeliangrong Baptist Churches Council North East India (ZBCCNEI)-ia Arogo ajak dang Manipur nung yimjung atema sarasademtsütsü ayongzük.

Oriental Theological Seminary, Nagaland-ia Manipur nung rara adoka nisung asüba, kiojen aser tekülem kitem den külemi shisaliok rejutem raksatsüba atema jashiba lemsatet.

OTS-i sangdogng ka ajanga, "Rara anentsü aser nisung asüba den kiojen raksaba nokdangtsü atema telok ajaki inyaksüla. Raraba aser tesempa mapatem onoki aitsür," ta metetdaksü.

Evangelical Fellowship of India (EFI)-ia state nung rara anentsü aser yimjung alitsü ayongzükba den külemi tai maket nisungtem asüba atema jashia mangyimba lemsatet.



May 06, 2023 nü Narotekong Baptist Fellowship, Ungma nung "Apuani na tamang nung liromedema ainba" omen nung ajemdaker anogo ka kibong seminar agiba sülen tangokba noksa nung angur. Iba seminar nung shisalen sayurtemji Straightway Christian Mission Centre kibur Dr. Aotemshi & Dr. Awala Temshi na liasü.

AO OSHI ANGAZÜKDAK:
TANÜ ANGAZÜKTSÜBA OJANG



Pungok

(v) joka tur langka ka nung oa anenba (jump into)

* Keyi kati nashi ka dak **pungok** aser nguset.

Pungpapungpar

(adj) taret masü (light weight)

*Kü khubo **pungpapungpar** liasü.

OLONG PAITEP # 6507

1			2		3		4		5
6		7							
					8				
9				10					
							11		
			12						13
	14							15	
					16				
			17						
								18	
19									

TIPIEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzük ayudak - (3)
- 9. Nungdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6505 TELANGZÜBA

TIPIEN

- 1. Lemtet, 4. Pila, 6. Shio, 7. Lungmi,
- 10. Telungjem, 15. Süoshi,
- 16. Züap, 17. Ngüm, 18. Sükzük

LANGTSÜNGLEN

- 1. Lisem, 2. Tkon, 3. Tali, 4. Pung
- 5. Lemjem, 8. Tur, 9. Agi,
- 10. Tezüng, 11. Tapok, 12. Asem,
- 13. Lits, 14. Azük

KHEN SHISADANGDI

ALOKBA TAMANGBA YIMSÜ MELENNER :

Sobangba : Temba, koda asü yamai tejak mekümer kazür na?

Alokba : Aet Temba, ni kangasa rataseta kazürba ya, asenok tamangertem ya Deobar shia envelope, envelope dang, oda envelope mesaruba Deobar mali, ya koda asütsü, asenok sensakerbo yimsü amangtsüa kanga jenjang tulu kümoko, tan Deobarn jia Full time pur medical re-embursement atema envelope, ya shitakba agibo lim Arogo shia Scale of pay yangludang catagory balala shirangba apir, talisa manepba tashitak (terminal disease) amala atema arogoia kang junga yanglur nung koda? Lia lia bo asenok ABAM yagi Bonus, küm nung 13th month salary ajak ya khangmesotsüa ana nung lir no, nibo Independent church ka nungang join süküma.

Sobangba : Shitaka, anaprongla atema survey agiang no?

Lilir : WhatsApp

TRIPA Motha tanishiri kaketshirtem atema flight tickets renemtsü



Manipur kübok tesem ka nung pei ki talidak toktsür jena aoertem nem chiyungtsü agütsüba angur.

Agartala/ Itanagar, May 6, 2023 (Agencies): Manipur nung tensa majungba atema TIRPA Motha tanishir Pradyot Bikram Manikya Deb Barma-i Tripura kaketshirtem anir arutsü nangzükogo.

"Kaketshir 50 shi ka Manipur nungi arunür aser iba jagi parnok nem plane tickets agütsüogo. Ni parnok aruba atema senotsü ajak agütsüogo.

Mapang tamajungdang asen nisungtem yaritsüba janga tongtipang" ta Pradyot-i ashi.

Manipur nungi kaketshir ajak May 7 nü Tripura tonga arutsü aser tarutsü anogotem ano nisungtem yaritsü mulunga lir, ta paisa ashi.

"Mapang tamajung ajurudang politics mebilemstüla. Mapang tamajung nung Tiprasa nungeri

ni kanga yariogo aser ni parnok yaritsüba jü teinyaktsü lir" ta Pradyot-isa shisem.

Manipur nung Tripura nunger kaketshirtem pei pei hostel nung CRPF security coverage kübok lir aser parnok ajak lendong nungi jenbua lir ta May 5 nü Chief Minister Manik Saha-i metetdakja liasü.

"Onoki Manipur nung tensa reprangdar aser kaketshirtem anir arutsüsa kümra mapa inyaksü saka aritepa meinyaktsü" ta pai ashi.

Manipur nung Tripura nunger kaketshir mesüra nisungtem yaritsü atema 24X7 helpline ka lapoka lir ta CM Saha-isa ashi.

Arunachal Pradesh sorkaria mapa inyaker Arunachal Pradesh sorkaria

akokba tashi Manipur nungi kaketshirtem anir arutsü atema mapa inyakdar ta Home Minister Bamang Felix-i ashi.

Pema Khandu'er sorkari kaketshirtem anir arutsü atema Manipur ketdangsurtem den osang agitepdar ta Minister Felix-i ashi.

"Kaketshirtem helicopter aser aircraft ajanga anir arutsü atema renema lir aser tensa repranger kaketshirtem Imphal airport-i anir arutsü" ta paisa ashi.

State sorkari chief secretary aser director general of police dena coordination committee ka tentetogo aser parnoki Manipur nung tensa reprangshimsü. Civil secretariat nung control room ka amenokogo ta Felix-i metetdaksü.

Manipur nungi nisung 30 tema Mizoram nung jenoka lir

Aizawl, May 6, 2023 (Agencies): Manipur nungi tetsür asr tanurtem dena nisung 30 shi Mizoram nung jenokogo.

Mizoram kübok district ana Aizawl aser Saitual ajanga Manipur nung kilometre 95 agi arrtsütepa lir.

Hokolbarnü nisung 16 Saitual district nung arua jenok ta Deputy

Commissioner Lalngura Tlau-i ashi.

Parnok Mizoram-Manipur arrtsü anasa North-East Khawdungsei yimtsüng nung jenoka lir aser district administration-i chiyungtsü aser tanga teyaritem agütsüdar, ta pai ashi.

Ano, Hokolbarnüsa Manipur

nungi nisung 14 Vairengte aser Saipum yimtsüngtem nung arua jenoka lir ta Kolasib district ketdangsur kati ashi.

Mizoram General Administration department-i deputy commissioner ajak dang Manipur nungi nisung arurtem mita reprangtsü tetuyuba agütsüogo.

Assam DGP-i competitive exams atema kakettem tenla



Boko, May 6, 2023 (Agencies): Assam Director General of Police G P Singh-i Boko nung aliba Jawaharlal Nehru College nem kaket aika tenla agütsüogo.

DGP-i Kamrup Superintendent of Police Hitesh Chandra Roy ajanga kakettem agütsü.

Central Library-i J N College, Boko indang Internal Quality Assurance Cell (IQAC) aser Boko Police ketdangsur Phanindra Chandra Nath nunger den yaritepa senden ka amen.

Iba senden nung J N College

principal Dr. Tapan Dutta menden liasü aser pai DGP dang mapa tajung atema pelaba metetdaksü.

Assam DGP-i tenlaba kakettemji Indian Polity, Modern History, Indian Art and Culture, etc aser science, history, mathematics, geography indang NCERT books dena liasü.

Iba sentong nung Kamrup SP Hitesh Chandra Roy-i college library, infrastructure aser tesem balala repranga senzü.

"Assam-Meghalaya arrtsülen asoshi iba college ya educational

hub ka asütsü imlar" ta SP Roy-i ashi.

"Kaketshirtemi kaket den medemer akümtsüka. Merang nung dang takok angur aser kaketshirtemi college level nungi competitive exams atema renemtsüla" ta paisa ashi.

"DGP GP Singh-i Assam kübok tesem balala nung competitive examinations atema kakettem tenla agüja arur aser pai kaketshirtem nem kaket tenlaba ya tang mezüng masü" ta SP Roy-isa metetdaksü.

Ukraine-i Russia indang hypersonic missile ka khazüka yokogo



Patriot Defense System amshia Russia indang Hypersonic KH-47 Kinzhal Missile khazüka yokba Ukraine MoD-i jangjatsüogo.

Kyiv, Monupii/May 6 (Agencies): Ukraine-i ashiba agi, parnoki tawa US nungi bener aruba Patriot defence system amshia linük yimtiba Kyiv kolak nung Russia nung indang hypersonic missile ka khazüka yokogo. Tang mezüngbuba Ukraine-i Russia nung indang modern weapon ka nokdangtetogo.

Kinzhal missile ya Russia nung indang tawa yangluba hadirtem rongnung kanga dang advance ka liasü. Russia military-i ashiba agi, iba air-launched ballistic missile indang range ya 2,000km lir, aser sound indang speed dang nungi 10 ben agi takraba aser khazüka yoktsü atema kanga tasak lir.

Hypersonic speed aser warhead tesashi na meyokteper yangluba ajanga Kinzhal yagi ali telung nung bunker aser tenem nung tunnel tema raksatsüteter.

"Ni iba takok asoshi Ukraine nung nem tenüngsang agütsür. Hau onoki 'unique' Kinzhal, khazüka yokogo," ta Ukraine indang Air Force Commander Mykola Oleshchuk-i Honibarnü Telegram ajanga lemsatop. "May 4 nü Kyiv region amakba mapang iba missile khazüka yoka liasü," ta paisa shisem.

Tang mezüngbuba Ukraine-i Patriot missile defence system ya amshia liasü.

Oleshchuk-i ashiba agi, Kh-47 ya Russia nungi MiG-31K tayimtsü ka ajanga khaloktsü aser iba ya Patriot missile tejang kati dang khazüka yoka liasü. Ukraine military-i iba masüdang

supersonic weapon khadangtsü asoshi parnok ket nung hadir mali ta shir liasü.

Kinzhal ya tir Vladimir Putin-i 2018 küm sayatsüba "next generation" hadir trok rongnung ka liasü. Hadirtem sayatsüba mapang Putin-i iba missile ya alima nung air defence system kechaia mekhadangtettsü ta shia liasü.

Iba air-launched ballistic missile indang speed ya Mach 10 (12,350 kilometres per hour) lir aser iba yagi nuclear mesüra conventional warhead tem benteter.

Ukraine-i Moscow kübok Kremlin citadel nung drone amshia Putin tepsettsü merangba tamakok angu ta Russia-i ashiba den parnoki telangzüba tesashi agütsütsü ta ashiba sülen Bresttibarnü Ukraine kübok tesem balala maka liasü.

Iba sülen Moscow-i, iba ken o dak sendakba nung Washington aitsüogo, ajisüaka Ukraine aser United States napronglai iba taitsüba magizük.

Patriot missile tem ya April ita tatemlen Ukraine tonga liasü. Parnoki iba system kwi parnok ket nung lir, mesüra kongsa amenoka lir iba indang osang magütsü, saka iba system ya US, Germany aser Netherlands-i agütsüogo.

Germany aser US nati iba system kaka yokba nangzükogo aser Netherlands-i ashiba agi, parnoki ana agütsüogo, ajisüaka tang kwi amshidar iba indang osang tejangja kecha mali.

Iba system amshia target

bushitsü, radar nung lock asütsü aser akhatsü atema Ukraine nung sepaitem kanga meranga training agiogo. Battery shia operate asütsü aser anepalutsü atema sepai 90 shi nüngdaker.

Ukrainian Defence Minister Oleksii Reznikov-i ashiba agi, pai 2021 küm August ita US semdangba mapang Patriot systems ya meshia liasü.

Paisa, iba system ngutetba ya pungmang ka ama lir ta ashi. Pai mezüng asüngdangba mapangbo US nung ketdangsürtemi iba system agütsütsü atema tamakoktsü ta shia liasü, ta ashi.

Patriot ya US-i mezüngbuba 1980s nung deploy asü. Iba system indang missile shia USD million 4 shi lir aser luncher tem ya USD million 10 alang lir, ta ken o asadangertertemi ashi.

Jenang kanga tasak asünung Ukraine-i iba system ya Russia nung tayimtsü aser hypersonic missiles tem khadangtsü atema amshitsü, ta bilemer.

Anüolen aliba linüktemi Ukraine nem sophisticated air defence units tem agütsüba rongnung Patriot system ya ka lir. Russia-i Ukraine nung indang tongtibang infrastructure, power facilities aser tanga tongtibang tesemtem amakba nungi kümzüksü atema iba system ya agütsüogo.

Kasa mapang nung Ukraine air force-i Honibarnü ashiba agi, parnoki Iran nung yangluba Shahed-136 drones ti khazüka yokogo.

Israel army-i West bank nung Palestine nung ana khaset

Tulkarem, Monupii/May 6 (Agencies): West Bank nung Honibarnü meita aoba mapang Israel nung sepaitemi Palestine nung ana khasetogo, ta Palestinian Health Ministry-i ashi. Kasa mapang local telungpur telok katia kasa osang agütsüogo.

Tulkarem yimti anasa Nur Shams refugee camp meita aoba ya Israel aser Palestine na taoba küm nungi rara tenzüker meita aoba inyakyim rongnung tesashitiba ka liasü.

Ministry aser Al Aqsa Martyrs Brigades indang Tulkarem branch (tir Mahmoud Abbas indang Fatah party den sendaktepa aliba telungpur telok) nati asür ana ya Samer El Shafei aser Hamza Kharyoush ta jangjaogo, ta metetdaksü. Tenaprongla ya arishi küm 22 liasü.

Iba hopta tetenzüklen Israeli settlement ka amakba dak sendakba nung temulung melemer rongnung Honibarnü khasetba nisung ana ya densema liasü, ta Israeli military-i ashi. Avnei Hefetz Jewish settlement amakba mapang Israel nung ka yirutsü aser garitem raksaja liasü.

Social media nung prokshiba video ka nung tasümgang ana kilem nung mepidaker aliba aser Israel nung security force tem asütsü ta bilemba sepaitemi tena temang asadangba nguogo. Mapang ka nungbo Israeli

forces nungi zümgsem kati tasümgang ka miyiptsü merangba nguogo.

Palestinian media-i ashiba agi, tena ya süogo ta jangjaba sülenang sepaitemi tena tasümgang toktsür ao.

Taküm küm tenzüker West Bank aser Jerusalem anütoklen Israel nung sepaitemi Palestine nung 104 tepsetogo.

Taoba küm Palestine nungertemi Israel nungertem amakba sülen Israel nung sepaitem küm ka dak tema aonungshia amai West Bank nung yimtsümg, jila aser yimitem meita arudar.

Israel-i ashiba agi, tarutsü nung Israel amaktsü aliba nungi jenboa alitsü atema telungpur network raksatsütsü atema parnoki item tesemtem meita arudar. Kasa mapang nung Palestine nung-i iba inyakyim ya Israel-i küm 56 tashi parnok ali atsünga aruba nung shilem ka lir, ta ashir.

Meita aoba sentongtem ayongzüka agi tenzüka sülen Israel nung sepaitemi Palestine nung 250 shi tepsetogo. Israel-i ashiba agi parnoki tepsetertem ya timba telungpurtem liasü saka sepaitem dak long agi aonba lanurtem aser iba mepetmesü nung kecha shilem magiba nüburtama tepsetogo.

Kasa mapang tsümgda Palestine nungertemi Israel nung 50 shi tepsetogo.

Iran-i Swedish-Iranian senso ka tepset

Tehran, Monupii/May 6 (Agencies): Iran-i Swedish-Iranian senso ka tepsetogo, shiba 2018 küm military parade ka amakba dak sendakba nung aija alirtem rongnung tongtiba liasü.

Habib Chaab ya Iran kübok south-western Khuzestan province nung Arab nung atema nüjiso akhangba separatist telok ka ngutetsang liasü.

Pa ya Sweden nung oa jenoka liasü saka 2020 küm Iran nung agent kati Turkey nung apu.

Sweden indang Foreign Minister Tobias Billstrom-i ashiba agi, par sorkari Iran dang Chaab metepsettsü atema mepeshia metetdaksüogo.

"Tasüba agi merenshiba ya meimchir dak mebenshitsu inyakyim ka aser meyipa magitetba temerenshia ka lir aser EU den külemi Sweden-i iba inyakyim benoka inyaksangshiba aitsür," ta pai ashi.

Ahvaz nüjiso atema Harakat al-Nidal, mesüra Arab Struggle Movement len aniba atema Iran judiciary-i Chaab aitsüogo. Iran-i ashiba agi, iba telok ya kiralongrar telok ka lir aser parnoki linük south-west nung

tesem balala amaker.

Iba province nung Arab nung kanga ajema lir aser parnok mezümeshia amshiba atema ashishia aruogo, koba Tehran-i magizük.

Ahvaz yimti nung 2018 küm military parade ka amakba mapang telungpurtemi Revolutionary Guard sepaitem dak injang khaloktsü aser civilian aser sepai 25 tepseta liasü.

Chaab ya Istanbul nung tetsür ka den ajuruteptsü atema mesür aru aser iba sülen pua Iran-i bener ao.

Ajisüaka Iran nung ketdangsürtemi Chaab ya koma apu iba indang osang tejangja magütsü. Iran tonga aoba sülen pai 2018 küm military parade amakba nangzükba indang state TV nung sayua liasü.

Prosecutor temi ashiba agi, spy service Mossad aser Sapo na tekümgzüka kübok 2005 küm nungi tesem balala amakba nung Chaab densema liasü. Mossad aser Sapo ya Israel aser Sweden indang spy agencies tem lir.

Parnoki ashiba agi, iba telok nungi tanga lenirtem Denmark, Netherlands aser Sweden nung amendaka lir aser iba telok nem Saudi Arabia nungi senotsü aser logistic teyari agütsür.



Central Japan nung Ishikawa prefecture kübok Suzu yimti nung Hokolbarnü menoknok anokba sülen ki raksar aliba ka noksa nung angur. Menoknok tesashi kati Hokolbarnü Japan dak kongshia liasü. Menoknok lendong nung nisung ka asü aser nisung 20 dak tema yiruba den ki aika raksaja liasü. Menoknok anokba sülen Suzu yimti nungbo anentsüh dena alua liasü.

World Boxing Championships: Akash & Nishant na pre-quarters-i iogo



Akash Sangwan & Nishant Dev

New Delhi, Monupii/May 6 (Agencies): India nunger boxer Akash Sangwan (67kg) aser Nishant Dev (71kg) nati tang Tashkent, Uzbekistan nung asaya aliba World Boxing Championships 2023 nung Honibarnü pei tata asaya koka pre-quarterfinals-i iogo.

Round of 32 asaya nung Akash, China nunger asayar Fu Mingke den asaya liasü. Asayar ana rongnung India nunger asayar ya tetenzük nungi Fu dang nungi tekaraba liasü aser pai kanga junga tsüngshia asaya, Akash-i talang nungi asaya aser asaya tepeyong Fu-i atsüngba kanga junga paitokteta liasü.

Tatembuba round nung China nunger asayar yagi kanga meranga asayadang ajisüaka Akash-i süngjemshir kanga ayonga asaya aser 5-0 ta unanimous decision agi asaya

koka liasü. Pa Mongolbarnü pre-quarters nung Kazakhstan nunger asayar Dulat Bekbauov den asayatsü.

Light middleweight asaya round of 32 nung India nunger asayar Nishant Dev, South Korea nunger asayar Lee Sangmin den asaya liasü.

India nunger boxer shibai taoba round nung Azerbaijan nunger world championship bronze medallist Sarkhan Aliyev tsükdakja liasü pai pa asayaba tasa kanga junga sayua liasü. Pai mezüngbuba round kanga atasa asaya aser round akoktsüsa Sangmin dak tsüngshia liasü.

Tatembangbuba round ana nung asayar anapronglai kati ka dak atsüngtsü meranga asaya ajisüaka Nishant-i tajungba tsüngshi aser pai iba asaya 5-0 agi koka liasü. Pa taruba asaya

Palestine nunger Foqahaa Nidal den Mongolbarnü asayatsü.

Deobarnü India nunger asayar Deepak (51kg), Mohammad Hussamuddin (57kg), Sumit (75kg) aser Narender (92+kg) nunger asayatsü.

Deepak, Tokyo Olympic bronze medallist aser 2021 World Champion Saken Bibossinov den asayatsü aser Hussamuddin, Russia nunger asayar Savvin Eduard den pre-quarterfinal asayatsü. Kasa mapang nung Sumit round of 32 nung Russia nunger Pavel Sosulin den asayatsü aser Narender round of 16 nung Cuba nunger Arzola Lopez den asayatsü.

Iba asayamung nung Olympics nung medal ngur aliba asayatem aika densema linük 107 nungi asayar 538-i shilem agidar.

Mokokchung Friday League Season 3 buba tenzükogo



May 6 nü Mokokchung Friday League Season 3 buba tenzükünü Match Patron Anuradha Hardware, Proprietor Mr.Mohan-i mezüngbuba asaya Revenant FC aser New Ecclesia asayatem den ajurua salemtepa noksa nung angur .

Mokokchung, Monupii/May 6 (TYO): Tanu Imkongmeren Sports Complex nung Mokokchung Friday League Season 3 tenzükogo. Mokokchung nung Football meimer kum 35 nungi temapur asayaba Mokokchung Friday League (MFL) ya taoba kum 2 Season 1 & 2 asayaba mapang kanga dang tajangzük ka-a asaya aser tang ya Season 3 buba tenzükoger, tanu iba sentong tenzükoga maodang Manipur tensa asoshi aria bilemtsüba aser iba lendong nung asürtem nem akhum aguja asayatem aser adenshia aliba telok ajak noktaker minute ka akhum agutsü.

Tanu iba sentong nung Dr.Lanu Walling-i mapang tatsüka agia jembidang Mokokchung nung Mokokchung Friday League ta tenung jateter season 2 tashi kum 35 aser temapur asayaba mapang temelenshi tulu ngua tajangzük nung tembangtetogo, yamaji tang season 3 buba ya takok ngua tembangtettsü asoshi ajaki tajungtiba nung shilem agidita ayongzük.

Dr.Lanu Walling-isa Mokokchung nung arishi kum 35 tema pur football asayaba ajanga lanu asensortemi iba football asaya nung jangratsüsa asenoki iba tangatetba nung asayadi aser iba Friday League

ya temaba jenjang nung ajungketa asayayonga otettsü tamang nung shilem agidita asayatem ajungmesoa ashi.

Ibas League nung team 6 shilem agidar aser tanu Match Patron Anuradha Hardware, Proprietor Mohan-i asayatem den ajurua salemteper iba asayamung tenzüktsü.

Sentong nung Tsüngremer leniba meshia Wb.Acha-i sarasadem aser Kongro Tamsüsangla-i ken tajung ka tena telok ayongzükba den Wb.Imcharen ajanga asayatem tenangzükba achaayanga agia aser Sb.Zülumanen ketdangsa nung iba sentong agia liasü.

AIFF-i club tasen atema bid asütsü jaoker

Monupii/May 6, 2023 (Agencies): All India Football Federation-i, 2023-24 season nungi tenzükoga I-League nung asayatsü atema club tasentem atema bid asütsü jaokogo.

AIFF-i taküm küm tetenzüklen sangdongba Vision 2047 plan kübok federation-i, wadang balala nungi club mesüra investor tem nem maongka agütsütsü asoshi triple-tier system ka nung I-League team timba kümdaktsütsü asoshi sentong lir.

New Delhi, Bengaluru, Pune, Gurugram, Chennai, Mumbai, Ahmedabad, Guwahati, aser Noida nunger ya Tier 1 yimitem ama jangiaogo aser item yimitem nungi I-League nung shilem agitsü atema club temi bid asütsü imlar.

Bid atema Tier 2 yimitem rongnung Ranchi, Itanagar, Jalandhar, Ludhiana, Phagwara, Coimbatore, Manjeri, Thiruvananthapuram, Bhopal, aser Shillong densema lir.

Bid asütsü jaokba nung shia aliba agi, loktitentet/club shirnoki bid kokdir parnok nem 2023 küm nungi football club tasen ka kibur akümtsü aser achaayangtsü asoshi temeden agütsütsü, ta AIFF-i

sangdong ka ajanga metetdaksü. Tender atema invitation ya May 7 nungi 22 nü tashi nung sen lakh 5 agütsür Football House, New Delhi mesüra email ajanga agizüketttsü.

AIFF executive committee-isa, May 1 nü tier-3 jilatem nung amenoker aliba club shirnoki bid asütsü mulunga lir parnoka jaoktsü asoshi benokogo.

Panchayats taziükba kübok aliba yimtsüngtem nungi lokti tentettem shirnoki bid asütsü mulunga lir parnoka jaoktsü, ajisüaka parnok ket nung stadium ka aser training facilities alitsüla, koba domestic airport nungi km 200 dak tema pilar malitsüla.

Committee-isa, tier 1 aser 2 nungi club tem atema bid value tajemba agi crore 5 aser 2.5 bosa asütsüla aser tier-3 bidder tem atema bid value crore 1 bosa asütsüla ta shiogo.

Tier-1 yimitem nung bidder tem net worth tajemba agi crore 100, tier-2 jilatem nungi net worth tajemba agi crore 50 aser tier-3 bidder tem net worth tajemba agi crore 40 bosa asütsüla, ta executive committee senden amenba sülen AIFF-i ashi.

Bindyarani Devi-i Asian Championships nung silver medal angu

Monupii/May 6, 2023 (Agencies): India tsür weightlifter Bindyarani Devi-i Honibarnü Asian Championships nung tetsür 55kg category nung silver medal nguogo.

Commonwealth Games nung silver medal ngur alila yagi non-olympic 55kg category tetoktepa nung 194kg (83kg+111kg) ajungketeta liasü.

Lai mezüngbuba snatch nung 80kg aser 83kg ayong ayonga ajungketet saka lai 85kg ajungkettsü merangbbo takok mongutet.

Bindyarani-i snatch nung junga majungketet ajisüaka clean and jerk nung asayatem rongnung tanabuba jenjang nung tembanga iba section nung silver



medal ngua liasü.

Arishi küm 24 tain asayar ya selection trials magi tsüngda yiruba ajanga iba asayamung nung la indang original 55kg weight division nung asaya liasü.

Bindyarani Paris Olympics nung asayatsü aliba 59kg weight class nung asaya liasü, aser taoba küm World Championships nung iba category nung la jenjang 25buba nung tembanga liasü.

Prabhakaran AFC executive committee zügsem asütsü shimogo

Monupii/May 6, 2023 (Agencies): AIFF secretary general Shaji Prabhakaran, Honibarnü Dhaka nung South Asian Football Federation (SAFF) Congress amenba mapang Asian Football Confederation (AFC) executive committee zügsem asütsü shimogo.

Prabhakaran shiba taoba küm AIFF secretary general asütsü shima liasü, pa SAFF representative ka ama AFC executive committee-i iogo.

"Tanü SAFF Congress nung AFC Executive Committee zügsem akümtsü atema shimba atema AIFF tenüng nung ni Dr Shaji Prabhakaran, Secretary General nem tenüngsang

agütsür," ta AIFF president Kalyan Chaubey-i ashi.

"Pai AFC Executive Committee nem teyari tulu agütsütsü ta ni amanger aser Asia nung football fraternity temi pa shimsü asoshi SAFF Congress-i telemtetba agiba pelashishia agizüktsü," ta Prabhakaran-i ashiba den pai Asia nung football terenlok atema inyaksü ta ashi.

"SAFF tenüng nung AFC Executive Committee nung adentsü atema maongka anguba atema pelar aser ni AFC tir aser par team den sendaktepa inyaka Asia nung football terenlok asoshi meranga inyaksü merangtsü," ta Prabhakaran-i ashi.

BILEMDANGANG

"Timtem tekangshi agi nisung ka kümkümdaktsür."